

Niev dacasa per la Scola da musica Surselva

La scola ha saviu retrer novas localitads d'instrucziun el baghetg dalla Regiun Surselva a Glion

DA HANS HUONDER / ANR

■ **La Scola da musica Surselva ha midau casa a Glion. Suenter che localitads ell'anteriura centrala da telefon dalla Swisscom han surviu durant 16 onns all'instrucziun ha la scola saviu retrer emperneivls locals el baghetg dalla Regiun Surselva. Otg stanzas che san per part aunc vegnir spartidas statan a disposiziun egl avegnir per l'instrucziun.** Avon in onn e miez ha la Regiun Surselva cumprau il baghetg dalla Repower el marcu da Glion. «Cun la cumpra havein nus giu la finamira da saver centralisar cheu aschi bia prestaziuns e puschida sco pusseivel», di il meinafatschenta dalla regiun, *Duri Blumenthal*. Tec a tec ei quei succediu dapi lu. El baghetg alla Via dil Glogn sesanflan il secretariat dalla regiun, il post pil svilup economic ni era il Center da formaziun Surselva cun sias partiziuns. Mo lu era igl uffeci da stumadira e concuors, igl uffeci civil e la curatella professiunala. El plaunterren ei plinavon previu da metter a disposiziun localitads d'archiv per exempel pigl archiv circuitual dalla Foppa. Per motivs da plaz resta quel buc en Casa Cumin a Glion.

Locals per scola da musica

Ussa sesanflan ella casa dalla Regiun Surselva era las localitads per l'instrucziun

dalla Scola da musica Surselva. Quellas ein vegnidas realisadas el plaunterren, leu nua che localitads da magasin e deposit sesanflan pli baul. Per la realisaziun da quellas localitads ha la conferenza dils presidents communalis giu concediu in credit da 615 000 francs. Uss ein las stanzas da musica realisadas e Blumenthal ei satisfatgs da quellas: «Ils architects han dau gronda breigia per scaffir in'atmosfera emperneivla cun bia lenn. Contribuiu al beinreussir da quellas localitads han denton era las interpresas participadas. Ellas han mussau lur gronda cumpetenzza.» L'activitad da musica en casa detti nova veta. Ussi seigien tuttas partiziuns e tuts uffecis dalla regiun sut in tetg. «Nus essan buca pli dependents d'alters baghetgs», constatescha Blumenthal.

Instrucziun decentrala resta

Schegie che la scola da musica dispona ussa d'atgnas localitads d'instrucziun a Glion resta l'instrucziun vinavon decentrala. «Nus vegnin ad instruir vinavon sco entochen dacheu en rondun 30 lohghens. Igl ei cunzun lohghens cun in menaschi dalla scola populara», di *Claudio Simonet* ch'ei menader dalla Scola da musica Surselva dapi igl onn 1984. En quei temps ei la scola carschida da rondun 500 scolaras e scolaris sin maximalmein 1269 igl onn 1998/99. Igl onn da scola



Il meinafatschenta dalla Regiun Surselva *Duri Blumenthal* (dretg) ed il menader dalla Scola da musica Surselva *Claudio Simonet* ein satisfatgs cupleinamein dallas novas stanzas per l'instrucziun da musica. FOTOS H. HUONDER



In schatg musical cun orgla pil menader dil Center da formaziun Surselva *Peter Kreiliger* (sen.) e per *Linus Weishaupt* dils architects *Vincenz* e *Weishaupt*.

2016/17 ha la scola dumbrau 742 scolaris cun totalmein rondun 10 000 lecziuns. Persuenter ein 41 scolastas e scolasts stai responsabels. Simonet quenta che quei diember resti stabils ils proxims onns. Dapi varga 30 onns ei la scola allura era adina puspei stada alla tscherca da localitads ed en quei temps ha ei adina puspei era dau midadas. Dapi 2001 ha la scola saviu nezegiar stanzas dall'anteriura centrala da telefon dalla Swisscom a Glion per siu diever. Las stanzas han ademplier bein la funcziun per l'instrucziun da musica. Sper las localitads novas ella casa dalla Regiun Surselva dispona la scola vinavon da quater stanzas en casa da scola da Glion.

Otg bellezia stanzas

El plaunterren dalla casa dalla Regiun Surselva eis ei stau pusseivel da realisar

otg stanzas per l'instrucziun da musica. Quater san vegnir spartidas cun preits. Ils locals ein construiv cun lenn, quei che dat in'atmosfera fetg emperneivla. Leutier han ins saviu endrizzar ina localitad pigl exercezi da bands sco era ina gardaroba, tualettas ed ina cafetaria cun bubrondas nua che las scolaras ed ils scolaris san era far penums da casa. Plinavon era ina stanza pils scolasts e per deponer material. «Als architects eis ei reussiu da scaffir bials locals cun in'emperneivla atmosfera da far musica», di Simonet. L'architettura da quellas stanzas da musica ei stada els mauns dil biro *Vincenz Weishaupt* da Glion. Per la resalisaziun dil project han els eligi in sistem cun elements. Las stanzas ein vegnidas construivdas en luvratori, transportadas el liug ed allura vegnidas stuschadas atras la fatschada aviarta per quei intent en lur posiziun finala. «Il temps che las stanzas ein

vegnidas construivdas sco elements han tuttas lavurs preparativas saviu vegnir fatgas el local. Suent ch'els elements ein stai piazzai ein els vegni colligai cun la tecnica dalla casa», declara igl architect *Linus Weishaupt*. Mintga stanza ei in element ch'ei buca ligiaus directamein cun tschels e cul baghetg. Aschia eis ei stau pusseivel da realisar il concept conform al tun. «Il concept da tun els locals da musica sco era la construcziun leutier ei vegnius elavurau d'in specialist da tun», declara *Weishaupt*. El zuler che ligia las otg stanzas d'instrucziun pon ins udir tgei musica che vegn fatga sin fundament dall'escha ch'ei meis grossa, mo ellas stanzas singulas eis ei ruasseivel aschia che mintga scolar sa seconcentrar sin sia instrucziun. Las lavurs ein vegnidas exequidas d'interpresas dalla regiun. «Ellas han mussau lur dun d'innovaziun e lur qualitat», puntuescha *Weishaupt*.

Danis: Danovamain art vi da las fatschadas

■ (rtr) Per la segunda giada organischescha il hostel Autra Causa a Danis in festival da street art. Different artists or da la scena internaziunala en envidads da vegnir a malegiar vi da las fatschadas dal hostel. Ina da las artistas è *Caro Pepe*. Ella è oriunda da l'Argentina e viva a Berlin. Sia marca è da malegiar dunnas cun be in egl. Sin la dumonda pertge ch'ella fetschia quai declera ella che quai saja sia furma d'expressiun che l'uman saja in individui subjectiv che haja ina vista incum-

pletta sin la realitad. Cun il maletg che Pepe ha picturà vi da la paraid vul ella simbolisar las perdavantas en sia famiglia, per exempel sia mamma, sia tatta euv. Fermas dunnas che hajan influenzà ella sezza da daventar la personalitad ch'ella saja oz. En tut quinta l'artista ch'ella dovria 45 fin 50 uras fin ch'il purtret è a fin. Il punct culminant è stà la fin d'emna cura che la fatschada davant da la chasa è vegnida picturada dals artists *QueenKong* da la Svizra.

AUGURIS

Gratulaziun a Trun: Ier dumengia, ils 20 d'uost 2017 ha *Laura Vinzens-Pianta* saviu festivar siu 90avel gi da naschientscha en Casa s. Martin a Trun. Ad ella gratuleschan las duas feglias *Vroni* e *Loredana* cun partenaris ed il fegl *Toni* cun partenaria *Heidi*. Lu gratuleschan era ils otg biadis e treis sutbiadis. *Laura Vinzens* ei ina fitta dunna che pren adina part da quei che succede el mund ed entuorn. Ella fa mintga gi sias spassegiadas e pren vivamein part da quei che schabegia en casa. Cun sia fa-



miglia ha la giubilara viviu biars onns a Trin. Ella ei adina stada ina fetg luvrusa. *Laura* ha mai seplirau ed oz tegn ella in stretg contact cun ses affons e biadis. Lezs engrazian alla mamma e tatta per tut quei ch'ella ha fatg e fa aunc adina per els. Era ils conhabitonts dalla Casa s. Martin, tut ils parents, amitgs e vischins da Trin e contuorn giavischan vinavon alla *Laura* buna sanadad, biars plaschers ed ina biala sera dalla veta. Nus alzein il migiel e clamein «Viva, *Laura*», e Deus pertgiri. *Elsa Caprez, Trin*

«Swiss-Ski Summer Trophy» a Glion

■ (anr) **Ils 27 d'uost 2017 ha la «Swiss-Ski Summer Trophy» liug a Glion. Las squardas a mingamai tshun affons ni giuvenils ella vegliadetgna denter siat e 16 onns semesiran en differentas disciplinas. Tgi che vul haver success ha da disponer da bunas qualitats en spertadad, equiliber, reacziun e cundiziun.** La «Swiss-Ski Summer Trophy» vegn arranschada era questa stad da Swiss-Ski en collaboraziun cun different clubs da skis ell'entira Svizra. Quella seria da stad ei dedicata ad affons e giuvenils. Las equipas semesiran ellas categorias «Youngsters» cun las annadas 2007 entochen 2010 sco era «Juniors» cun las annadas 2002 entochen 2006. Quella seria da stad duei animar ils giuvenils sportists digl unviern da sefatschentar era dil trenament da stad en fuorma d'in giug. Aschia san els mussar lur qualitats da forza, cundiziun ed equiliber en connex cun in arranschament plein aventuras e tensiun. L'entschatta dalla trofea vegn fatga allas 08.30 sigl areal da scola e sport da Glion. Beinvegni ein era aspecturats e fans. Swiss-Ski ed ils sponsurs digl arranschament porschan giugs, surprasas e proviant.

Ulteriuras informaziuns ein da cattar sin la pagina www.summer-trophy.ch



Affons e giuvenils semesiran dumengia proxima a Glion alla «Swiss-Ski Summer Trophy». MAD